

光緒鎮海縣志

鎮海縣志卷二

形勝

天下大勢西臨洮北沙漠東索南帶皆臨大海明  
州負溟渤控扶桑爲東南要會而鎮海尤扼全郡  
咽喉號稱外戶標奇識險昔人論列詳矣茲采其  
尤者著於篇

定海

今鎮海

蓋海壖之地三方距海中央微隆四面斜落如

伏龜之形海道輻輳之區南則粵廣東則倭人北控高麗

商船往來物貨豐衍蛟門虎蹲天設之險

乾道  
圖經

控海據山爲浙東門戶

方輿  
紀要

雲白前書未報重得來况知賢甥石季甫當屈鄧令尊堂

憂灼賢姊涕泣上下愁勞舉家慘感何可爾邪輒爲足下  
具說鄧縣土地之快非徒浮言華豔而已皆有實徵也縣  
去郡治不出三日直東而出水陸並通西有大湖廣縱千  
頃北有名山南有林澤東臨巨海往往無涯汜船長驅一  
舉千里北接青徐東洞交廣海物惟錯不可稱名過長川  
以爲田火耕水種不煩人力決泄任意高下在心舉鍤成  
雲下鍤成雨旣浸旣潤隨時代序官無逋滯之穀民無饑  
乏之慮衣食常充倉庫恆實榮辱旣明禮節甚備爲君甚  
簡爲民亦易季冬之月牧旣畢嚴霜隕而蒹葭萎林鳥祭  
而罍羅設因民所欲順時游獵結罝繞堽密罔彌山放鷹  
走犬弓弩亂發鳥不得飛獸不得逸眞光赫之觀盤戲之

至樂也若乃斷遏海浦隔截曲隈隨潮進退採蚌捕魚鱠  
鮪赤尾鋸齒比目不可紀名鱠鱖鰻炙蟹鯢烝石首臠魴  
鱖真東海之俊味肴饌之至妙也及其蚌蛤之屬目所希  
見耳所希聞品類數百難可盡言也昔秦始皇至尊至貴  
前臨終南退燕阿房離宮別館隨意所居沈淪涇渭飲馬  
昆明四方奇麗天下珍玩無所不有猶以不如吳會也鄉  
東觀滄海遂御六軍南巡狩登稽嶽刻文石身在鄧縣三  
十餘日夫以帝王之尊不憚爾行季甫年少受命牧民武  
城之歌足以興化桑弧蓬矢丈夫之志經營四方古人所  
歎何足憂乎且彼吏民恭謹篤慎敬愛官長鞭扑不施聲  
教風靡漢吳以來臨此縣者無不遷變尊大夫賢姊上下

當爲喜慶歌舞相送勿爲慮也足下急啟喻寬慰直說此  
意吾不虛言也停及不一一陸雲白

陸士龍答  
車茂安書

案是書乾隆志僅節錄數行嫌其有他邑事羈入  
也然必登全書方稱全璧以便考據

慶曆七年十一月丁丑余自縣出屬民使浚渠川至萬靈  
鄉之左界宿慈福院戊寅升雞山觀硤工鑿石遂入育王  
山宿廣利寺而不克束辛巳下靈巖浮石湫之壑以望海  
而謀作斗門於海濱宿靈巖之旌教院癸未至蘆江臨決  
渠之口轉以入於瑞巖之開善院遂宿甲申遊天童山宿  
景德寺質明與其長老瑞新上石望玲瓏巖須猿吟者久  
之而還食寺之西堂遂行至東湖具舟以西質明泊舟堰

下食大梅山之保福寺莊過五峯行十里許復具舟以西  
至小溪以夜中質明觀新渠洪水灣還食普甯院日下舂  
如林村夜未中至資壽院質明戒桃源清道二鄉之民以  
其事凡東西十有四鄉鄉之民畢已受事而余遂歸云

王安

石經  
遊記

海內之山皆發源崑崙分爲中南北三條浙在南條盡處  
由三衢括蒼走東甌天台會稽抵四明四明二百八十峯  
爲郡境諸山之宗其南經奉化東趨於金甌天童太白鄞  
峯玉几至穿山崎頭伏入於海漸引而爲大榭小榭爲大  
賴長嶼畧山大小千桃花朱家尖山自長嶼北入海復峙  
爲舟山峯巒千百開屏列嶂盤溪隱畧映帶森鬱延袤可

二百里演漾若滄溟中浮一環璧也其左入海峙爲馬秦順母梅岑洛迦諸山右入海爲金塘烈表冊子諸山入海而湧於北者爲馬墓長塗秀岱蘭劍諸山莫不排空列戟四周而爲藩園憑高而望氣通脈絡狀若波瀾表裏江海營衛暢達扶輿清淑之氣流峙蓋非偶然也浹口之南分太白餘條東北走爲竹嶼青嶼樂家嶼入海爲蛟門虎蹲雄據上遊足稱天險黃茅七里遊山抑又其餘脈矣其北本四明東北之支度鄞而慈入縣界爲達蓬伏龍山由是循沙而行奠位浹口之北爲招寶入海散處者爲東西霍三姑遠望於洋山馬蹟陳錢此山形之概也若夫稱百二之壯麗擅東南之偉觀則後鄞大嵩阻其南而與錢爵昌

國爲聲援龍山管界殿其後而聯觀海慈谿爲犄角舟山  
則維以岑寶螺岱四司以固東南之鎖鑰縣城當水陸之  
要會以抗郡治之咽喉蓋不獨五縣之保障實東浙之藩  
垣也乃若盤畧據三十六盤之勝瑞巖逞十有二峯之奇  
達蓬東趨蓬萊可到伏龍南首蜿蜒猶龍金塘森列見青  
障之倚天蛟峯屹立爲中流之砥柱梅岑寄子眞之迹卽補  
陀翁洲遺稚川之蹤安期醉墨紋燦桃花徐福棋枰竹枝  
風掃其他含靈毓秀碧洞丹崖爲神仙幽怪所居者蓋不  
可勝紀招寶扼江海之口抵障狂瀾其巔則構以龍宮貝  
闕雲漢昭回新城則環負圖書天然顯麗升高縱覽旁眺  
八垠溟濤鴻濛浩無窮際洪濤拍天轟雷捲雪元氣吞吐



地軸推移驗海潮之應月觀旭日於扶桑倏若凌虛倒影  
排雲御風三山赤水飛仙往來之處恍惚可得而窺也至  
若高麗日本琉球三韓之屬峙列島嶼若鳬若鷺若隱若  
見納質貢琛帆船麇至魚鹽商賈航甌閩而直抵瓊崖泛  
吳會而遐聯海岱乘萬斛之舟駕長風而輕舉千里固瞬  
息也自昔狡倭弋利疆圉繹騷唐宋經營望海置鎮今則  
翁洲立縣尤固藩籬雖萬竈雲屯舟師鱗集而久安長治  
之計端有藉於雄圖碩畫焉

嘉靖志

有客自中州來過吳入越歷我蛟川以爲遊覽之况至此  
索焉盡也余顧謂曰客所謂况盡者倘所謂觀止乎曰不  
不謂無名區勝概之足以結人遐賞奇觀迭覽之足以供

人覩記也僕曰嘻客亦可謂管窺天際蠡測裊海者矣請  
悉數之少畱更僕緬維天分九域地列四維牛女野分乎  
星紀啟明景曜乎東隅定固揚州堇子之國會稽勾甬之  
墟襟長江而負大海控百濟而望島夷義馭胎光於暘谷  
冰輪濯魄於金樞旭日晡時以起照靈陰朏朏以揚輝震  
旦入埏實地盡而始見登暉萬國伊天近而先知若木之  
華乍企足而可捋扶桑之幹一舉手而可披若夫海王百  
谷朝宗萬川鴻波吼地駭浪吞天洶隱洶礧溟濤渺汚瀾  
滄景濤浹滌汙泐探尾闕而無際發崑崙而有源遡歸墟  
以下注通河漢而上旋日入則晚潮激左地浮於水日出  
則早潮激右水外皆天雪陣騰空震千雷而動地銀山捲

浪飛萬馬以奔泉陽侯伏波而呀呷馮夷噴浪以消溇天  
輪激轉而何極地軸爭迴而無邊木華記之而不盡盧肇  
賦之而難全其廣也東達高麗日本南達琉球交趾西連  
吳會一瞬可航北抵登萊片帆直指若夫遠島諸夷海外  
雜國雕題黑齒穿胸僭耳之洲真臘扶南天竺岐首之屬  
埒渤澥之浮漚眇滄海之一粟以言乎山則金雞秀登竹  
嶼挾海曙以飛鳴虎蹲雄據上游當潮來而樾闕蛟門險  
開天塹控兩浙之咽喉龍山綿亘坎維列三區之項背金  
塘開上腴之保障舟山奠海嶠之雄藩普陀洛迦大士現  
身以說法靈峯招寶仙人煉石以彈碁巾子削四方之山  
梓蔭鍾千巖之秀亦有虹橋蜃浦龍角鳳窠鼉穴鼉宮不

待燃犀而悉炤龍潭蛟室不階尺木而可躋盤巖據三十  
六盤之勝瑞巖逞十有二峯之奇東西霍飲北海而環抱  
大小樹走東幹而離披蓮花石牛之紀異潮音磐陀之聳  
奇若夫東南之偉觀河山之壯麗後霏大嵩阻其前而與  
錢爵昌石爲聲援伏龍管界殿其後而聯觀海慈谿爲犄  
角石馬桃花列其東達蓬灘澣繞其西六橫雙嶼出其南  
劍衝蘭秀環其北礁如銅鑼白馬洋如橫水青龍港如馬  
墓黃崎門如鳥沙灌沈以至奇山怪石窮島別嶼水簾瀑  
布玉澗冰壺如螺如筭若冕若鷺名不及記筆不勝書繡  
錯珠聯列干門於海岱星羅碁布壯萬國之藩籬至於建  
有六城麗有九所元戎開府統三軍者一萬五千衛所屯

營侯萬戶者一十八姓四司十總統轄兵戎千戶百兵掌  
明軍籍載道飛紅黃之蓋比戶束金銀之腰亦有大小教  
場水陸營伍軍門建柱來督撫以時巡副府開基列叅遊  
之駐所更有兩司行館四府居停閩閩與閩閩相連軍庫  
同厰倉並列廟分文武祠有公勳釋迦大士之招提文昌  
魁星之磴閣鶴林鹿苑風鐸聲聯鳥革翬飛棟雲影亂月  
城井井雉堞鱗鱗鉦鼙偕警柝時鳴鐘鼓振潮聲迭響礮  
臺瞰海先聲怯吼浪之魂鐵鎖橫江一截斷長驅之勢堡  
屯相望烽燧遙瞻汎哨迴環運軍機於叵測巡司聯絡備  
海警於非常萬馬屯營千艘夾岸干戈列棘何殊十面鐵  
圍貔虎當關絕勝八門石壁通長江之一線鎖巨浸於重

關六國自此以來王諸番由茲以入貢此輿圖廣記不能  
詳海防類考所必載者也若乃登山觀海眺遠憑高綺閣  
臨江危樓插漢山城擁乎天關金刹耀乎日觀霞擁曦曦  
舒捲輝煌錦繡潮迴星斗晶瑩紺碧瑠璃日月漾萬頃之  
金波風浪捲千尋之銀練嵐浮海面抹塗幾卷丹青雨沐  
山容點染數重蒼翠於是指帆影於天邊數歸櫓於眉睫  
觀魚龍之出沒望島嶼之森羅眞所謂圖畫天開海天一  
幅金湯地湧夷夏分區者也更可異者當夫晴嵐杳藹烟  
霧空濛片帆遠去大鉢凌空或現瓊樓與玉宇或像貝闕  
與金宮或顯奔騰之人馬或幻縹緲之仙蹤或駕長虹於  
海嶠或聳巨壙於雲中或耀魚須之萬卷或張鶴蓋之千

重既有目而共見亦一誠而可通有物類之相感眞理數  
之難窮若乃升恆占潮汐之消長晦明審蚌蛤之盈虛海  
鳥驗颶風之作止青蠅徵蛟龍之蟠飛此則顯諸事而驗  
諸人者也更有寶螺放光以燭天石龍吐雹以致雨鰲魚  
駕帆以候風方諸見月而吐水瓊蚌孕質以曜珠石蚶揚  
花以吐紫研貝瑩文以燿燦螻蟪化生而硯礪章魚八足  
而首似膽懸比目兩身而體同翦合若乃河豚江豚海鯨  
海獐黃鮑黃鰕石斑石魴穿山之鯨鯉鑽穴之鰻鱧烏賊  
嚙墨以懷禮水母目蝦以習智瑣蜆腹蜃以爲宮玉珧駕  
瑤以爲柱龍頭軟瓊玉之簪闌胡捲沁銀之鐵淡菜擅名  
於東海自古有夫人之稱土鐵鍾美於南田海內現廣長

之舌此海錯之珍異而迴出於鱗介之常者也魚則鯉有  
元駒白驥黃驢華舫整潔爲鱗黏滑爲鱖旅行爲鯽羣遊  
爲鰈鶴骨爲魴烏腎爲鱗獨行之鱖羣隨之鰯緩性之鮓  
護鱗之鰈啗魚之鰻子魚之鰻姜公之鰻五侯之鯖魴之  
方體鱸之細鱗鱖之乙骨鱧之七星鱸之玉版鮫之珠文  
鰓之鳥翼鯢之扇輪鱗則鼻長腕則鼻短鰓則似輶鰻則  
如織鯊則吹沙鯨則登木介有龜鼈鼉黿蠃蟹蟹有  
螃蟹蟪蛄蚌蟻蜃蛤有牡蠣蜃蜃蛤蜊蜆蜆海扇車  
螯馬刀魁陸蝸贏海燕貝子蚌蠃至若龍生九種蜃有二  
名螺分珂玳鸚鵡螺分牡石麻蜃鼈產賁鵝瘡攝龜產朱  
珠納能以至魚虎水馬潛鵠鉤蛇庇貉象鼻豹文龍顏蚌



目豺口雉軀狸班此尤不可方物者也更有淵客織綃於  
冰室蛟人泣珠於懸洲江妃含嚔以綿渺海童邀路以沈  
游巨鼈負以冠山鳥鰲呼吸以吞舟駢馬騰波而噓噤  
水兕雷咆以吽吼鯤鯨鼓鬣而插漢鯨鯢搖尾而截流噓  
息則六合風生磅礴則四瀆濤起踳踳窮波則臚骨成嶽  
資糧萬物則剗肉如林或探頤而得珠或拔眼而得寶則  
海物之繁盛又豈得而涯量者乎魚之最利於民者時維  
四月則有踏水春來黃花石首綿若山排聲如雷吼千舟  
鱗集萬櫓雲流登之如蟻積之成邱已而鼙鼓震天金鑼  
駭谷漁舟泊岸多於楓葉之臨流網罟張崖列若飛鳧之  
曬羽金鱗玉骨萬斛盈舟白肪銀膠千門布席時有富商

大賈十萬腰纏卽在負販經營百千指屈交歡貿易島嶼  
成市井之饒報賽迎神窮海有彼都之樂優娼博戲綵閣  
連阡貝貨雜陳元黃奪目簫鼓雜邪許以高張欵乃和謹  
呼而迭饗文身編髮盡吳越以來賓燕語馱聲遍閩甌而  
逆旅一旬出沒而萬井殷盈三水往還而千門足給及秋  
則有金絲鰻鱧銀帶條魚一鉤而連引數頭一餌而齊吞  
眾尾千家切玉萬戶拖銀或燔或炙或燂或烹魚無鱗而  
味更清鰻類蛇而品較勝貨盡達乎舟車利非止乎浙閩  
則漁利之普遍又豈得而窮盡者乎夫有魚不可無鹽若  
夫海王之國爰有鹽筴肇自夷吾通於膠鬲結筏爲鍋擣  
灰代鐵烈火燒之而不焦瀾水盛之而不溼乃熬波以出

素時澆沙而構白初日照爲銀星旋霜凝爲玉屑電人手  
足重趼面目黧黑於時蘊隆蟲蟲具舉烈烈就赤日以招  
涼呼薰風以解渴編蒲葦以成衣就鹽池以飪食人酷烈  
以少舒彼溽暑而益力迨徽商給引嵯院巡鹽盡數撤徵  
延塗額辦千村烟火大充府庫之金錢萬甕泥沙半佐司  
農之寶藏猗歟積雪如山兆庶堆沙而不及峻烹波日竭  
千秋煮海而不能乾則鹽課之甲於東南又豈得而計量  
者乎客曰嘻誠若所言則山海魚鹽之勝莫有過焉者矣  
若於物產之盛遊觀之美有可得而與聞者乎僕曰定固  
東南之奧區山水之藪澤傳所謂草木生禽獸居寶藏興  
貨財殖龜鼉蛟龍魚鼈生者此邦是也他方所殖無乎不

殖異地所產無乎不產似難瑣詳而悉數之也請以物類之轉輸於外而他方之輻輳吾邑者約言之可乎以言物產稻有光細細稈早黃烏撒茶有雀舌龍團普陀太白山終白芒絳寒煥而成衣熟灌龍精別貴賤而爲服穀美百名菽分五色薪採萬山酒釀千澤白油有繼晷之功青靛有出藍之益巨勝蕙珠蠟黃蜂蜜麋鹿角茸虎豹骨革雉尾獐髮兔毫狸服製錦簾屏斑文篋席鑲金器皿嵌銀裝飾竹箭樓欄綠藤紫石果以珍異名者金罌玉乳銀殼晶荷以鳥獸名者雁喙鳬苾牛心馬乳桃李夏熟棗栗秋成枇杷盧橘自昔稱名嘉慶楊梅於茲特勝水則蓮藕芰實陸則金豆含桃鵲殼朱欒芳香益烈甜梅丹橘色味俱新

瓜分胡越西南菜有恭臺菘芥蔬中之美則春笋茭白番  
藷薯蕷蹲鴟萊菔布瓜落蘇海中之菜則青苔紫菜海粉  
石蓴鹿角龍鬚石華土肉白鯊鰓鯊普利四方乾肉乾蝦  
聞名九有土儀備物則螺皮海蛇風螺冰魴鯉腊鰾結之  
俱珍海物必佳則泥螺鹽蜆蛤醬蠟黃鯷鮓鱈之諸錯  
聚貨自南則丹荔龍目蓮實瓜仁甘蔗橄欖石蜜沙糖燕  
窩沙翅香蓴海參福橘佛手茉莉劍蘭聚貨自北則羌桃  
膠棗青餅番桃薤菰椒目黃菜金針蒺藜枸杞菱米葡萄  
榛松之子梧杏之仁道從海運貨利舟乘當雄關之扼要  
實泉貨之通行可朝發而夕至若土產而根生當夫南風  
初動海波不揚兩湖聚賈八閩通商珠璣萬石菽麥千倉

杉木枋板結作駕橋乘風噴浪瞬息抵關參天量地矗雲  
疊山工師千里取材萬閒諸路駢集百貨殷藏山輸海貢  
萬賈千商居停逆旅擊轂摩肩於時有秀黛蛾眉朱樓翠  
館豔舞妖歌不吝千金以買笑爭妍取眷願矢百歲以爲  
歡有逞櫻桃之素口有舞楊柳之蠻腰有贈江皋之女珮  
有弄月下之鳳簫靚妝則膩粉流街舞袖則香風載道新  
歌一曲而振木遏雲醉飲千瓢而山頽玉倒遊人雜沓月  
明沸午夜之笙歌銀燭輝煌風動清黃昏之筦簫則商賈  
之盛繁華之美誠東南一大通衢也當夫葭灰吹管黍谷  
回陽迎春賽社闌豔逞妝褰冠博帶朱紱繡裳雉翠鸞羽  
狐掖蟬冠襜褕祛服綺縠羅紈瓊花寶勝玉珮金璫飾韎

韋之附注耀組練之金裝披粉袂以璀璨被綵纓以香煌  
偉僬僥以聳觀象侏儒以美觀或一入尺之展舞羽于於  
衢道或倍十乘之駕飛將帥於雲端更有綵樓繡閣畫舫  
蓮舟騷人陂禊士女遨遊譜忠孝之軼事傳節義之芳流  
備四民之物則獻八國之共球爾乃春娃妓女朱粉青眸  
逞新妝以比麗嬌媚骨以含羞蕩春風於馬上鼓逸興於  
平疇日照腮而暈臉風拂錦而纏頭走三千之粉黛倒十  
里之紅樓人魂搖兮似醉馬欲去而若留已而燕歌趙舞  
吳歛越謳嬌鶯簧之婉轉齊鳳管於瑩篴人土木而欲舞  
賜鐵石而亦柔至於上元屆節太乙祠修銀花旣合玉漏  
方催燈火千家門門燦爛樓臺十市處處絃歌士女效鶴

林之遊金石動漁陽之摻燭龍吐燄火藻千門獅子搏毬  
威稜百獸鼉山選勝何殊金谷輞川翦綵爲花莫不瑤林  
琪樹爪牙具而吞噬皆具衣冠成而骨節俱動花瓶賽燄  
飛楊柳以垂絲火樹生煙放梨花而噴玉荷開池館梅放  
雪枝鱗非水而自遊禽不鳴而善舞輕輪弱線動人物以  
生機取影篝燈像儀容而劇戲高升插漢晃晃見星斗光  
搖爆竹喧天刺刺報平安奸信若夫硝黃紙器煙火層臺  
奏巧千般建標百尺猱猴猴以獻果舞蜂蝶以穿花的礫  
眞珠倒捲雙鈎簾幙光瑩明月紫凝萬點葡萄朱火熒熒  
丹葩燦燦蓮座映玻璃之寶殿姮娥輝玉兔之蟾宮城廓  
嶄然陡擊震霆之礮石千旄燦若忽鑒人馬以戰爭燦萬



狀以飛光妙藏機於一縷燭千尋之烈火忽灰滅於俄頃  
此又蜃樓海市幻中之更幻者也時當祠陳祭屈懸艾浴  
蘭龍舟競渡水馬浮江輕舸數葉駕六翮以齊飛赤幟雙  
標逐羣龍而戲水喧阗震野鑼鼓翻江負舟有力走前隊  
以奪標以身爲漁臨深淵而角勝亂蛟螭之脅息狂士女  
之嬉遊東海潮頭常擊伍胥之怒汨羅江上時招三閭之  
魂則風俗之好遊觀之美亦熙時一勝賞也當夫嚴霜初  
降天地肅殺修武備繕甲兵審獵劉時類禡懸鵠印佩虎  
符明采章辨服物旌旗有青龍白獸朱雀元武黃龍應龍  
龍馬玉馬鳳凰鸞旗鷄鶴太平麒麟飛麟飛黃馱驥白澤  
五牛犀角金牛兕旗角獸角端吉利驪騶騶牙黃鹿白狼

赤熊辟邪莛文白刃爲建牙萬里以明大勝之徵爲立表  
八方以兆吉氣之應刀劍有金穎鐵英流綵飛影紫電白  
虹華鋒寶鏐鱗缺星鐔豪曹盤郢純鉤湛盧墨陽青冥或  
青龍突陣取銅於若耶之溪或金馬托形出錫於赤堇之  
頂弓矢有緣沈黃洞棠溪魚腸楚桃蜃珧丁令角端桑觚  
鉅黍楊幹青檀鷺羽羊頭僕姑信往鳴紃走括熊渠亦且  
服其利洞胸穿扎夷牟不能比其良盛甲有鋌螯鉅鍛縹  
金首鎧兕革犀皮纓綵綴組細鉉棠夷烏鎚鑠子山文細  
鱗楚蛟鄭兕流矢拔戟無以加其首曠芸白刃不能捍其  
胸銃礮有紅夷發貢威遠地雷九牛百子鳥銃狼機焦蒸  
焜上火箭神旗藺石溟答窩蜂飛炬攻堅則百壘灰飛破

敵則千軍電掃戈矛有鋒鋌雄戟勃盧長殺蕭斧及鉞龍  
盾鶴膝雍狐屈盧苗鋒珍鉞於鹵陽夷刀鉞矛鉞孤父犀  
渠吳鉤越戟棠溪皓鏐無以敵其鋒越冶名工鮮能精其  
術良馬有元蚪蒲梢紫虬蒼螭綠虵紫燕青驄赤驕追風  
躡影絕地翻羽超光騰霧挾翼踰輝銅爵晨鳧鐵驄金裏  
鳳臆龍髻魚目雞斯飛兔元馭纖驪秀騏配以玉鞍控以  
金絡名高夏后之龍價倍田方之贖舟船有飛廬艤艣  
衝巨艦海舩雲艦蒼沙鳥尾青翰鴻毛海燕水鵲翔風飛  
鳧逐龍馳馬吳榜弘舩尖舩舩艇犁舩水艣福青鷹號八  
槳四划五樓三翼駕海成梁織千艘以夾岸擎波似掌走  
萬里以衝濤若夫武士糾糾征夫烈烈龍驤虎賁磨至麟

集穿域踰鞠超距投石縛石搏獅梟雄騎突鷹麟鷁視援  
臂駢脅徒手鬪很袒裼角力挾刃明霜衣金被鐵舞劍輪  
鎗挺鋌仗鉞橫梁奪稍揮鞭擲戟朱鬢鬢髮緹衣韎韐游  
纓寶校玉珂金珰侔三邊之挑戰壯一軍之校閱走駟駿  
以鷁駮騁風髮而蠡鬻雙瞳夾鏡兩權協月河精耀采似  
伏波之鑄銅震象飛文笑東瀛之刻玉翹趾金鞍之上電  
掣而星飛委身玉鐙之旁鷹翻而鷁擊人誇桀驚之雄馬  
走流離之血始爭鋒於教場旋宣威於簡閱當夫楊葉旣  
指雕弓始殼射夫來同巧力畢奏陡與的謀手與括湊百  
步應節七扎皆透懸賞則的破銀牌博勝則氣吞牛酒顏  
高望而色沮飛衛見而卻走山羿忸於手拙幽并慚於技

陋若乃將帥閱武春秋耀兵材官嶽列將士雲屯擬北落  
而樹表踞壁壘以結營設中權以作鎮維大師以爲城棘  
門節露步陣旗分鵝鶴魚麗鱗罕鳥隼二百河魁之將三  
千太乙之軍明五伐四伐之律正六步七步之行扈長騎  
之蹋石建雄虹之綵旌垂宛虵之餘綬抗招搖之華旂三  
奇六合七變五成已而臨寇警號帥矢敦奮擣走陸梁舉  
戈林聳揮鋒電掣朱旗絳天元甲耀日挺鼓鳴鉦揮桴振  
鐸焱拉雷駭霧集雲合機震蠡軼鴻緇繼獵時分旗以擣  
虛時合圍以攻實金木水火之陣旋變化乎五行鳥蛇龍  
虎之章乃運用乎各極方則布棊圍則轉石曲則蟻盤直  
則蛇一激矢螭飛礮石浪擊破堅摧剛訊執醜獲夜行晝

伏之勇載露布而星飛追風躡影之騎奏羽書而鳥疾於  
時虎將宣威倭夷獻馘奏凱班師饒歌按節反旆悠悠振  
旅戢戢至於巡按御史督撫軍門清海甸嚴寇警數軍實  
整甲兵陳師鞠旅赫聲濯靈恩威震聳賞罰嚴明整四郊  
之營壘備三鼓於崑崙虞伏莽之竊發習夜戰以聲聞擯  
千烽以爲炤列萬礮以爲聲燃旌旗以爲燄走人馬以爲  
燈爾乃登高瞰下憑幽燭明焱焱炎炎耿耿熒熒燄燄燄  
射朱火飛騰非惡師之始句忽矛端而火熾類成都之夜  
戰乃戟鋒而先生陣列率然耀羣龍之雙眼行分雁陣點  
魚目之青睛月羽俊兮素魄滅星旗施兮朱光騰烈火燧  
兮千山赭煙精透兮九天焚冰刃結兮清風起霜戈迎兮

赤雲與刁斗夜鳴兮儼如風雨之驟至銜枚疾走兮不見  
人馬之奔騰金光鏡野燐熾烹雲吐虹霓以歛燄震霹靂  
以施焜烈如山單火牛之攻卽墨黑如孫贖萬弩之捷馬  
陵熾如武侯炬燒博望之坂疾如忠武火攻建安之城爾  
乃燧象燃烽連雞渡火琉毬颺發九天拋明月之珠烟氣  
霞蒸四野繞斗樞之電流星盪而雨箭插天火礮升而轟  
雷礚地鳴鼓而進疾於萬點之星飛奏凱而還絕勝百輪  
之燈轉時而半明半滅倏去倏來渡曠野之流螢燭平蕪  
之燐火已乃電捲星迴烟消霧散中丞起座乘輿下山礫  
戟前驅駕火龍以夾道燎垣旁列布虹影以騰霄吐萬丈  
之金光開九衢之玉露衣冠鱗萃走千里而來觀士庶趨

齡喜四郊之不夜則夜操之美非海內所罕觀者乎客曰  
嘻誠天下一奇觀矣古詩有日畫角秋聲動山鬼旌旗夜  
色泣江神一輪火鏡飛寒霧千丈金蛇掣暮雲此殆過之  
矣僕曰未也定扼要江海接壤倭夷屯宿重兵時嚴寇警  
則水戰不可不講也當夫水師鱗聚戰艦連艘岸甲盈千  
隊隊穿江列陣篙師巨萬紛紛駕海連雲鉦鼓鳴而虎帳  
高懸渙號班而龍旗競展樓船欲動駕海上之巨鼇戰艦  
初開擊天邊之飛鵲櫓聲搖拽而澤國鼉鳴錦纜斜吞而  
長江鯨吼爰有篙工榜人機船鼓柁觀天時以盡變審海  
礁以出危看鷗母以候風準指南以定日旣而寇警風聞  
千櫓雲集建大纛於中軍分部伍於四翼化羆虎爲鼉鼉



易衣裳以鱗甲挺緩鉞之長戈標糾虬之鉤戟揮斷檣之  
月斧煽焚縹之烽鏑狼弩飛牙鳥鎗彈錫羽箭攢金長鉞  
齒鐵揚灰沙於上風布疾藜於下席超漲截以追奔洞凌  
波而冲奪馳迅往之流駛織奮飛之畫鷁類九萬之鵬冲  
儼三千之鷗擊風生天竈兮蒨旆襜褕電飛碧落兮羽干  
熠熠帆影掛空兮天飛雲起橈檣亂流兮海沸水立火礮  
連天兮地裂山摧烟雲晝掩兮風霾霧黑登桅上斗升百  
尺之猿猴下矴維舟入萬尋之蛟室時揚帆以捩舵等萬  
斛於鴻毛倏破浪以乘風走千里於瞬息觀其變幻出奇  
奮雄襲敵爲孟德之出軍濡須爲周郎之焚舟赤壁爲秦  
伯之茅津濟師爲祖逖之中流擊楫爲莊躋之克伐沅水

爲謝元之奏凱淝捷爲淮陰之出師井陘爲允文之建奇采石餘皇旣奪爲楚師之獲子魚於上流蒙衝載擒爲董襲之斬黃祖於沔澤至於滔天之封豕旣殲橫海之長鯨翦滅罔象望而奔號靈夔見而喙吸文鶴駭而怯飛精衛怖而戢翼則水戰之奇非海內所鮮觀者乎客曰嘻是又天下一曠觀矣古詩又曰萬甲蟠胸老氣雄將星光照海雲東鼓角聲催巫峽曉旌旗映炤錦江春於今見之矣雖然吾聞武備之盛甲於東南亦旣聞命矣若於聲名文物之盛或者所長在此而所短在彼乎不然何缺焉未之講也僕曰旨哉客之問也今夫遐稽遯覽考古證今盛陳山水而不及人物者非地之美也極言武備而不揚文教者

其論之正也此固僕所欲言而未逮者也請進而畢其說  
焉定蓋海運鴻文川涵特秀扶輿清淑之氣先景曜於東  
皇山川涵濔之才必觀瀾於溟渤故百川學海而萬水朝  
宗所繇來矣粵維斯文統系曹放齋倡美於前道學儒宗  
沈端憲興起於後東發學成文潔伯成業廣弁山曹說論  
難五經獨明天理樂良貫通六藝衍派考亭粹中避檜而  
自號放齋劉洪抗越而獨存夢臺世南五絕瀛州首冠乎  
李唐天錫二雛大統克延夫趙宋傳絲綸於密勿應繇氏  
兄弟之齊芳美甲第於同登孫枝氏父子之濟美執權賦  
成於薛賓而洞賊投戈明堂詔擬於應憇而叅知拜表仁  
規仁厚伯仲而金紫銀青陳治陳憲父子而繡衣驄馬乃

有神童中選御史連徵梁氏四昆輔建文於靖難劉鼎一  
語擒宸濠之應援袁甫首占夫大魁張信聯元乎鼎甲平  
江邑宰謝家墳重乎千秋林邑城隍白牛廟正乎萬祀宗  
禮發康七之夢文淵落豪右之魂王愷秉正以樂休徐潭  
刻木以釐弊浩淵築軒於梅月敏德適志於盤溪亦有四  
發經元兩魁浙榜堦簾翰苑兄弟尙書恭敏勳高乎戎政  
文介典禮乎秩宗邵司馬冊立諸藩名轟朝野謝觀察克  
平西蜀威振荆蠻韓氏科甲之傳芳趙姓弟昆之聯桂舜  
賓績隆乎師帥我躬氣懾乎權雄薛緯符風流刺史雅美  
詩豪華心齋慧業詞宗書傳草聖蘭階進秩世濟聯科累  
葉名臣同胞八座或監軍西土瘁王事於耆會或奉節南

征擒渠魁於盤占或聯元乎雍北或經魁乎弱齡有三捷而兩奏聯登有連科而一門三雋若於籍吾定者則有蔣猷抗論而童貫解兵龜年進章而秦檜罷相世傑覆舟以殉宋秀夫負帝而賓天若夫死國亡家肯堂盡精忠於海上全孤報主無凡仲大義於吳中永佑率屬以焚軀世勳粉身而著節此又與邑乘中同光不朽者也至於黃公之祠劉伶之墓豐稷之居陳塤之宅旣班班而可攷亦蹟蹟而可徵非撫之也若令於定者仁有盧萬惠有夷庚叔翰廷臣贅塘障海宋宣賀懋勤政惠民興學興賢則任順劉俶克明克惠則汝栗如京陳軾陳袞之清介周懋周魯之廉明繼祖之百廢具舉何愈之萬利皆興黎民表條編惠

定顧宗孟挑渠戢兵建學親賢則推龔彝賢令愛人節用  
則首李氏維屏乃若捐軀築塘之黃恕卻金賑士之一和  
顧充著捷錄之編包莘譔蛟川之集則又倅教中之表表  
者也至於武功之選將帥之臣唐宋元明亘嚴海徼王公  
侯伯世掌元戎顏制司通道穿渠一隅保障王統制螯塘  
捍患海外長城安陸侯調衛定所信國公徙島安民胡宗  
憲戡互市之亂劉草堂障狂倒之瀾翦滅倭夷盧北山戰  
功獨茂肅清海島俞大猷用兵最神侯繼高運籌決勝楊  
宗業保定安民大帥開邊威繼光濯磨神武元勳鎮島毛  
文龍發軔功名秉鉞親戎則張公可大脫巾靖亂則何鎮  
斌臣陳洪範錫尚方於東魯王之仁舉義旗於西陵至於

偏裨牙將部隊揮兵旣筆乘之難悉惟幕府之策勳至忠  
如葉七之中創斷纜孝如永慶之沈海救親義如樂枌之  
友讓代死節如棟妻之罵賊殞身乃有董旌孝子邵表義  
門賢良誌里慈孝名村枯池泉湧乾塗蛤生剖肝葉府斷  
髮沈英林氏雙烈沈君一門文行忠信若薛與謝清廉狷  
介有艾與陳若夫貞夫節婦孝子仁人捐軀殉國割股救  
親毀容勵操殺身成仁眞紀載之不盡有流傳之失真若  
乃墨士名公仙蹤佛迹荆公鏡誠於梓蔭子昂撰文於碣  
石襄陽作賦於候濤南禺大書於城壁思白題額於鸞宮  
文長進表夫白鹿緯眞鐫贊於珠林蛟門刻銘於鼇側龍  
川記頌聿來閻氏仲儼鼇柱咏題爰有錢公龍錫亦有碣

出晉人碑傳魯國洞賓貌諸葛之出師道子鏤大士之眞  
蹟文進寫關像於廟碑馬遠圖立相於陰石羅隱有書字  
之巖左慈有杯楸之石翁州畱稚川之蹤海岸遊美門之  
迹安期醉墨紋燦桃花徐福棋枰風翻竹葉眞人錫號則  
首雷谷致和釋氏開宗則稱惠超善月亦有夷舶顯聖之  
觀音沙塗現相之石佛金鐘振響於江心淵井發源於海  
北鐘山自鳴鼓吹似擊響巖有聲佛嶼有迹獅嶺三毬龍  
潭九節箭峯如鏃印山如匣磊石發火磁石引鐵藥赭丹  
爐箸生方竹金剛有巖善財有穴仙人之洞潮音之窟金  
仙憩足於葛峯舍利飛光於烏石潮生八月客浮牛女之  
星槎海湧三神墨漲蓬萊之仙闕若於朝南海進信香禮



大士渡慈航瑤林瓊島紺殿祇園連雲插漢岸海瀾天精  
廬八百閣黎十千珊瑚構柱玳瑁爲梁青艘與丹粟競采  
白金共紫銑爭光現三十二相之神異妙五十三叅之莊  
嚴萬乘兩宮遣中使以絡繹九州四海渡佛國於津梁玉  
餅寶鼎金象珠幢袈裟金紫瓔珞丹黃罄太倉之玉粒萃  
異域之梅檀地稱三佛靈美百蠻俾五嶽之重鎮冠四大  
之名山山以海而增麗佛以日而彌彰羅天台雁蕩之勝  
景陋雲門玉樓之奇觀若夫翠華東幸御輦南翔則有始  
皇訪仙於蓬島煬帝著迹於洋山高宗南渡以航海宋理  
時乘以御天句踐東封乎句甬劉裕遠戍乎句章錢鏐築  
城於望海徐偃卜居於翁山若夫徐市千人潛居南海衛

溫萬甲不到亶夷陳稜伐國奏績胸山仁貴征遼出師大  
狹袁鼂翁山之亂魁史浩補陀之聖迹孫恩由此而出亡  
張俊自茲而克復元朮於是而北還國珍恃此以據割巾  
子磔裂夫卞彪碇齒受降乎王直劉香歷險而潛遊芝龍  
審勢而遁匿鳴謙釀禍於一柱斌卿忌斬夫本微名振矯  
殺夫虎螭六御敗亡平阮七成功掩襲以窺關常武宣威  
而禦敵至於天戈東指海禁時飭王師千里則有將軍固  
山統轄六軍則有部院提督以至魯王隱迹於觀山諸藩  
避難於海僻名公巨卿金柯玉葉沈淪渤澥填堙山谷死  
忠死孝全義全節皆事之章章者也最勝者大舜誕降東  
夷故論孝有遵海之喻神禹掘地注海今會稽有魁穴之

存帝王將相雖至尊而式臨人物古今俱按時而可考於四海爲東南之極於兩儀爲日月之鄉於千山爲重興之始於萬水爲歸墟之邦流峙雄奇有張得中之賦形勝河山表裏有王應麟之序七觀至於鳥獸草木罄竹難書物產貨財伐毛難悉無徵不信說無取乎二三窾見寡聞語不殫夫什一客於是俯首沈默避位跼蹐舌旣吐而不能收口旣張而不能喻有頃客復曰噫是誠可謂觀止矣然而又有說焉夫山海人物奕世猶存先生所謂漁鹽商賈之盛風俗軍容之美何今日少概見乎僕曰彼一時此一時也客亦知海氛尙爾未靖關禁尙爾嚴竣乎舟楫未利則漁鹽商賈不能以自通烽燧時嚴則風俗軍容亦不無

少變當今在事諸公或茂功於海島或奏績於綠林或治  
賦以足餉或強武以衛民重以當亡之廟謨勝算神武天  
威用張撻伐以奏膚功使鯨鯢倏焉授首而樂利於以頓  
興特轉盼閒事矣客請得見而知之乎客曰說有大而倫  
誇者駕說也詞有華而失實者勦詞也先生之言如數家  
珍而探囊物夫豈有隱於煩支者乎余於所聞勝所見矣  
井魚之不可觀大海夏蟲之不可語冬冰信然乎

謝泰定蛟川形

賦勝

謝泰宗跋  
夫俯今者昔是追悼衰者盛是仰人情乎  
在操觚家深於一往矣苟有以寄其思聞之上古而非  
邀冀有以徵其實諸目前而非誣即事賦形象物備  
美登高者取況焉第曰靡麗之文已乎相如上林揚  
雄甘泉所不至以規焉與也其亦抒噓通志觀指而知  
歸循該而抉要固不在綴詞魚網之上錢心鳥迹之中

矣不然者研京以十年鍊部以一紀腐毫吮筆亦胡用  
恂愁自苦爲者明其所然張在此而獲落卽在彼心豔  
於縛陳而俯仰係之矣不腆下邑非所龍黿與處魚鼈  
與遊者乎然網山於有牢使海於有弊如人七尺之軀  
管鑰在一寸之喉矣夫是以談形勝而非富厚也視治者視  
者觀武而鐵室之備固覽風俗而非敦言者敦行而  
農而四民之業正表人物而非衣冠也敦言者敦行而  
德造之美隆今日者爲能盡由於是乎維茲盛世倍堯  
在上混吾在下隨所舉而觀厥成焉傳之後代童叟尙  
能抵掌而談秉文獻者實藉爲典冊重今又豈能恆由  
於是乎余嘗有意邑乘之役欲侈其所甚備者不能不  
憫然於所不必備者爲躊躇久之乃天申弟先以蛟川  
賦示我若指南談形勝則山川壯覽風俗則富厚具表  
人物則衣冠盛若似乎三都二京之麗下邑不啻方軌  
而絜駕焉然鐵室果有倍乎業正於此民美隆於德造  
果野無草舍無淫乎維茲盛世其致此亦必有由也朝  
廷刑斂是省蒞茲土者寬然有居官長子孫之意則民  
咸樂其生矣以之試師于負穀笈而誦詩書也豈不稱  
親賢樂利之休誦熙攘無已時天申固已神遊斯境矣  
夫民樂其生無不由政得其理維茲盛世其無能長享  
於今亦必有由也天申又已神遊斯境矣故正言之不  
足每寓言之微言之不足必暢言之楊子所云勸一而

諷百其賦中深意乎甯第爲下邑賦也惟是一寸之喉  
無恙而後七尺之軀獲安卽端爲下邑賦可也夫豈徒  
俯今而昔是追悼衰而盛是仰者哉讀  
是賦者不可不知其歸而挾其要也

東門浦論曰案王家硯閘爲縣城出水要口負郭之田旱  
則資其灌溉澇則藉以宣洩自永樂年間塞後河淤爲塗  
縣城內外之水隔絕不通每逢大旱年分城廂一有火災  
倉皇失措非特無以利農功并無以保民居也議者謂王  
家硯閘之塞亦自有道蓋水不出王家硯勢必出張鑑硯  
左水倒右俗語所謂青龍過堂又屬西流之水主文秀此  
特就堪輿家而論也殊不知就堪輿家而論水有自左倒  
右亦有自右倒左總看龍之來勢及有情無情并合局與  
否耳如合局有情卽白虎過堂何害否則青龍過堂亦屬

無益且張鑑碑西流之水非天然出水之口決諸西方則西流正不妨決諸東方則東流也查碑闢舊向係卯酉兼乙辛年湮代遠更向不便而江沿放水處可稍折乙辛兼卯酉乙辰同宮正收得縣署子方及西水門申方諸水堪輿家所謂來自生旺流於休囚正合會而聚成一局况縣署後梓蔭山下諸水爲本邑隨龍之水一滴元神猶人之本身骨血今從西水門轉南而過署前城濠出王家碑不但水躔元武而且一氣貫串毫不外洩如出張鑑碑滔滔而出水不上堂且張鑑碑水口無羅星而王家碑有金雞虎蹲禽獸諸曜孰得孰失不辨自明前人謂宜求故道不獨爲一方風氣之攸鍾者職是故耳

采訪

案是論爲邑令黃敬熙撰黃公字曙巖江西萍鄉縣人辛酉拔貢同治八年來攝縣篆精堪輿術下車時相度形勝謂吾邑欲大振文風掇巍科登鼎甲躋卿貳而任封疆富農桑而饒積聚非開東門浦不可查是浦閉於永樂年間議者謂不利下元甲子暫塞六十年復開則啟閉順時大得氣運矣同治十年辛未孟春黃令將赴章安任臨別時誼囑邑人林嵩堯云此論宜載入縣志以備采擇果能據此準行其效可操券得也願有志者勛諸

附請開東門浦公稟道光年間王曰升袁國清樂涵夏廷鑑鄭德標夏寅陳修敏陳修己陳修紀陳修簡謝潔賢朱藩車漢沛鄭棠史偉樊尊性金漢津林誥胡在洙李昌鉅陳懋毅車漢全王仁餘葛志元等呈爲各工



告成叩再恩賜乘時開濬以復舊觀事竊東門浦爲鎮  
邑水道總口形勝文運攸關前紳士愿次呈請有案十  
一年閒升等遵諭復修城河書院亦經公請因時利導  
通達水道奉批開復工費約須若干是否堪以並舉抑  
俟各工完竣再行辦理之處着再會同妥議月稟察奪  
升等因奉此本應即時議覆因思城河書院工程浩大  
一經同時興辦誠恐未能始終其事是以先將各工趕  
緊濬修而浦口一項公議緩圖以致尙未覆案舊歲東  
門浦舊基就居民估搭房屋已被火災日久恐蹈前  
轍升等會經呈請駕勘釘界在案故地廓清舊觀可復  
莫不共深感仰今城河書院各工業已次第落成而東  
門浦口未便置爲後圖是以升等會議公同估計浦硤  
工料約須六百千文浦口工費約須二百千文又張鑑  
硤改築平水石堰工料約須二百千文不蒙於百廢具  
興之後乘時開濬舊觀何日得復爲此備情  
公懇恩賜乘時開濬以順輿情以復舊觀  
又呈爲河工將竣懇恩卽賜開浦以利民生事竊東門  
浦爲鎮邑出水故道文運攸關邑志所載故老所傳信  
而有徵更無異議或慮地勢較高出水不便低田恐遭  
淹沒不知北鄉之田憂旱而不憂澇開浦自必測其高  
下相時啟閉卽使淫雨過多但須於張鑑硤改築平水  
石堰倘河水泛溢任其踰堰而去更萬無淹沒之慮

光年開前紳士王曰升樂涵鄭棠袁國清車漢沛車漢  
全王仁餘等稟請開浦早有此議此有利無害者一也  
或慮潮水驟漲灌入城河將使良田變爲斥鹵不知潮  
之漲落有定開浦則設碶建閘高與塘齊河滿卽開河  
淺卽堵必不致鹹水灌入如謂開東門浦則必灌入何  
以張鑑碶獨不灌入乎且何以沿江各碶甚多皆不灌  
入乎此有利無害者二也或慮東門浦逼近海口潮流  
迅急護城海塘恐致坍塌不知開掘浦口必曲折盤旋  
以殺水勢何至使潮流衝擊激况除故址之外舊塘腳泥  
土口高民居稠密豈有坍塌之慮此有利無害者三也  
或慮開浦則湖水泛溢民盡爲魚不知此獨不見海塘以  
不開浦亦屬可虞若在平時斷無慮此獨不見海塘以  
外一帶民居百十年來安堵無恙乎卽如道光癸卯秋  
開海水驟溢塘外居民亦未見有一家漂沒者又何論  
乎城內也此有利無害者四也凡此利害瞭如指掌無  
不在仁憲洞察之中煌煌憲示萬民瞻仰又豈浮議所  
能動搖現屆河工將竣不蒙乘時利導民望奚慰  
爲此備情公懇恩賜開浦以靖浮言以復故道  
咸豐年間張錫申等二十人呈爲請復故道以興水利  
而慰眾望事竊鎮邑自五代置縣以來於東門浦設碶  
建閘以資疏洩河流暢達制度周詳千百年來莫之能  
易雖地逼海濱而自宋迄元未聞有以鹹水灌入爲虞

者明初湯信國沿海置衛始跨濠爲城關門者六穴水  
門於小南門之右其相度形勢最爲詳審而東門浦之  
碇仍其舊不改事在洪武二十年至二十九年指揮劉  
澄增置西水門以接慈谿西來之水永樂以後王家碇  
與西水門同時閉塞而別開西南新開山是河多淤塞  
故迹日湮此張東沙大司馬所爲慨然於故道之宜復  
也隆萬間始復開西水門而東門浦至今未復城三中  
河之水悉傾注張鑑碇以洩於海而慈水西來未及趨  
城遽已奔瀉淳泖無地灌漑何資父老流傳幾慨想  
前邑尊郭濬河時業經紳董王曰升等二十餘人稟請  
開浦以經費不敷遂爾中止幸逢仁憲厯念民瘼首興  
水利詳考志乘率循舊章此誠鎮邑萬世之利閩邑士  
民曷勝欣慰乃自告土以來一月有餘尙未興工申等  
翹企之私實深焦灼攬前人之遺迹念故老之傳聞誠  
恐千載一時之盛舉格而不行爲此合詞公叩俯察輿  
情刻期勸事聞後故道一而塞張鑑碇俾北鄉三河之  
水合流東注以入海旱潦有備  
啟閉因時食德蒙庥永永無斃  
同治年開謝棣賢等十六人呈爲故道久湮亟請開復  
以壯形勝而資疏洩事竊鎮邑東門浦有王家碇自五  
代置縣建城以來迄於宋元相仍不廢明洪武二十年  
信國公湯和更建石城規模展拓始開南水門而東門

浦之硯初無變易二十九年指揮劉澄增立西水門永  
樂年開西南新開塞西水門及王家硯自是河流淤  
淺內外不通嘉靖時鄞人兵部尙書張時徹相度地  
謂宜修復故道接西來之水勢則由東以洩匪直風  
攸鍾亦且兼資灌溉志乘具存班班可考隆萬開始  
開西水門邑中父老歷代相傳俱以東門浦未開爲  
道光初年邑尊郭開濬內外城河紳董王曰升等稟  
請開濬又以經費不敷中止伏思鎮邑江北之山自  
龍蜿蜒東趨峙爲招寶一支入海一支出右繞之勢  
陰山而企明嶺而印山其餘脈有右繞之勢鎮城南  
中三河之水皆自東而西注出南水門合北鄉西來之  
水繞城東而洩有左抱之形蓋必開東門浦而後山水  
交榮秀靈薈萃覽其形勝實甲明州幸逢仁憲垂念民  
艱首興水利并議開浦以復故道合邑之民欣頌奚似  
乃告土以後時日久淹翹企旣殷私衷轉迫爲此不  
煩瑣合詞公叩迅速舉行以復故道俾河流暢利賴  
垂傳諸不朽

鎮海縣志卷三

風俗

記曰脩其教不易其俗齊其政不易其宜鎮邑廣  
谷大川民生其閒者異俗昔人謂溫柔敬愛有無  
荒之風由今考之士食舊德農服先疇尙已其他  
亦或蕩靜各殊純醜參半司牧者欲整齊教誨以  
共登安平康樂之書是在因其勢而利導之亦國  
奢示儉國儉示禮云爾

川澤沃衍風俗澄清海陸異珍所聚人雜五方俗類京口  
隋書地理志

世族蟬聯重圭累組庠聲序音洋洋鄒魯習鄉上齒少長

有序俎豆秩秩章逢楚楚

王應麟七編

帶江瀕海之地蠻舶之賈於明明州之販於他郡率由此出入蛟門虎蹲可以熒纜謂之泊潮縣御前水軍雲屯數千竈人物阜繁魚鹽富衍士習相承皆詩書禮義之訓而山谷之民耕桑樂業有老死不識縣邑者俗多醇厚云

寶慶志

陳景沛案曰宋御前軍駐劄凡四千人營在縣後

五里

南接蠻島汪洋數千里食息可至厥今號爲重屯四方語

言啾囁侏僂交衢旁午褰衣儒冠見者訾議

袁桷藏書記

定濱大海居斥鹵之中其土瘠而無灌溉之源故耕者無

終歲之給然瘠土之民嗇而能勤勞而能思故其俗甘勞  
苦務織作溫柔敬愛有無荒之風焉然利近東海民資漁  
罟出沒衣食之源過於農耕遂多重彼輕此野有蕪土而  
人習風濤又其鹽之所煮與象相埒雖燠雜多憂亦庶幾  
免於艱食乎案乾隆志今七鄉之民盡力農畝卽世籍亭  
戶亦莫不耕耨爲主故山高海漲悉墾爲田  
專事魚鹽至於學校人材自沈端憲倡道於前袁文肅廣  
學者鮮矣者鮮矣學於後詩書益衍至明張信首魁天下文學輩出彬彬髦  
士擬迹鄒魯矣然其地薄故室無再世之富其民貧故鄉  
鮮綺麗之競其性弱故催科易集而甘安於無聰其習浮  
故民易動以訛而不可質的其時變所趨亦有捐生觸禁  
以謀不貲之利騁枝葉之詞興無根之訟昔人謂巖谷所

居有老死不識城郭者竟安在哉

嘉靖志

本朝定鼎鎮士漸被文明之化家詩書而戶絃誦自海禁  
既弛魚鹽蜃蛤之利遍被他郡其入過於力田所謂刑罰  
罕用衣食滋殖正其時也其催科易集其獄訟鮮少官茲  
土者可不勞而理蓋皆賴

國家休養生息之澤云

乾隆志

居山者以耕鑿爲生瀕海者以魚鹽爲業

宋王存之傳記

陳造定海勸農文 國家務重農穀凡張官蒞政無非  
勸農之意又命守令率歲二月出郊延父老諭以此意  
其望爾其切爾服勞力用頻享富歲之樂爾爲爾勸不  
幾贅乎抑勤之外猶有可進者茲不容默夫常賦不可  
缺爾甯不知而卒憚於輸送致煩追逮或加鞭扑田業  
已所有而假它人戶籍出沒遮覆毀不敗露卒不可掩  
殿嘗聞訟以爭毫末墮棄耕耨靡耗裹裘足皆積習迷  
不反者不可不痛自改倭夫官租未輸官吏勞攘於上



而里正長旁午於門酒食酬謝夫豈能免或受杖而不  
免於輸所損如何託名寄產已負刑憲歲或出穀人各  
有心終未必可保不忍小忿求伸其氣而不免愧首下  
顏胥吏之前捐金求售恐其卻之所得幾何所喪多矣  
三者未去雖勤於農恐未能享農之利也爾以吾爲非  
欺盡更舊習無撓官法心閒無事畢力於農晏受豐登  
之樂而令亦得少休憂勞不兩利歟  
爾父老訓詩子第各諳鄉里無忽  
柳永鸞海歌 鸞海之民何所營婦無蠶織夫無耕衣  
食之原太寥落牢盆鸞就汝輸征年年春夏潮盈浦潮  
退刮泥成島嶼風乾日暴鹽味加始灌潮波壩成涵潮  
濃鹽淡未得閒採樵深入無窮山豹蹤虎迹不敢避朝  
陽出去夕陽還船載肩擎未遑歇投入巨壑炎炎燕晨  
燒暮爍堆積高才得波濤變成雪自從豬滿至飛霜無  
非假貸充餼糧秤入官中得微直一緡往往十緡償周  
而復始無休息官租未了私租逼驅妻逐子課工程雖  
作人形俱菜色鸞海之民何苦辛安得母富子不貧本  
朝一物不失所願廣皇仁到海濱甲兵淨洗征輸輟君  
有餘財罷鹽鐵太平相業  
何惟鹽化作夏商周時節

案沿海居民多以網罟爲業其船甚輕捷而名色

亦夥有曰張網船曰對漁船曰小對船曰酒網船  
其捕魚名目曰冰鮮曰收鮮曰劈鹽曰採淡曰釣  
秋曰大莆曰挑莆凡絕島窮岸人迹罕到之區冒  
險往來率以爲常閒有多載食物出洋取利者邇  
因汛口稽查嚴密此弊稍除

元日先夕灑掃室堂門庭五鼓而興設香燭男女禮服拜  
上下神祇陳果餌酒饌以祀其先懸遺像於堂序拜尊長  
男子則出拜宗族親戚謂之賀歲每家各具酒席以相延

款

嘉靖府志

立春前一日縣官以綵仗迎春至日祭芒神土牛試耕種  
行耜田禮頒春於士大夫家各家作春盤春餅飲春酒

嘉靖

府志

正月上旬夜

在初八日

女子邀天仙或厠姑問吉凶

嘉靖府志

自十三夜起四衢懸綵張燈為火樹烟花之戲至十八日

乃止為元宵節

嘉靖志

十四夜各家以秫粉作圓子如豆大謂之燈圓享祖先畢

即少長共食之取團圓意

雍正府志

十四夜各家合瓜豆棗栗多種芼以為羹呼為了頭羹其

俗倡於何時亦不可考相傳家婢旨蓄雜物至是合煮奉

主各家效之後遂交相餽贈

采訪冊

張振夔詩

春正月十四陳侯綽有佳餽云是了頭

羹風味君且

試挈榼熬炙手勸匙酸觸鼻兼用盈六物

糜爛混一類

瓜果醬諸蔬棗杏雜餚饌湯玉糲雲井賣

辛桂辣備縷切

碁子同名質團油譬膠牙甘似飴適腹

腐於鼓五侯鯖略同百氏漿差異王羹與相粥何惡亦  
何嗜坐喜兒女飲爲述古先事改饌原下逮命名奚取  
義傳聞古女奴左右稱良侍入室生吉祥誦詩工嘲戲  
常得大母憐頻受佳節賜沈沈倭瓜紅滴滴青葵翠差  
差錫絲結團團膏環鳳蹲鴟大於拳栗棗開皺出銀杏  
落花生蓮子各各施不爲別室短願奉同堂食云當伏  
臘來春饗事委積廚料雜端樣烹和無才思明朝正元  
宵團圓家室利傾筐爲糜粥嘗口百無忌大母聞此言  
生受娃鬟意謂今啖汝羹富壽期無異家翁大喜歡咄  
嗟事治相招嚼復嚼相顧媚更媚情和納繁釐格破  
成大始歲歲遙相傲某某那復議元日椒柏觴重陽萸  
菊餌社飯迨仲秋棗糕仍冬至風土將毋同酒食安從  
議鄉鄰敦質樸不飾佳名字願予忝素餐此味亦偶遂  
授日方流涎來者竟取次屢和餅一朝腹果然安報  
美人貽依約搖禿毫咀嚼得興寄爲補詩家  
題既成難自祕金吾夜無禁試就燈前視

十五夜各家以火照田閒除一歲侵蝕蟲名曰燒橫蟲又

行七家橋婦女率以爲常

乾隆志

清明各家於前十日掃墓封土插竹掛紙錢於顛門戶皆

插柳或簪於首爲青餠黑飯牲醴祭墓各具辛盤寒食名曰攢盒凡大家望族男女老幼齊集上湖河塘登舟沿隄一帶小艇繫纜笙歌徹耳金鼓喧闐多舟銜尾出西水門亦多時勝會也

乾隆志

三月望後東郊賽社金鼓喧闐彩仗鮮明觀者如堵城廂內外各處懸燈射覆演戲迎神

采訪冊

立夏以赤小豆和米煮立夏飯

雍正府志

俗以烏笋煮羹食之

謂之接腳骨權人輕重以下一歲壯邁并驅疾癘

乾隆志

初夏黃魚

即石首魚

起發謂之漁期漁船出洋乘潮捕魚水底

能鳴其出入以三汛爲度俗名頭水二水三水每汛將畢各船銜尾而進卽捕烏鰂船亦然招寶山下沿塘一帶檣

帆如織四方商賈爭先貿易至六月初旬三汛方畢除漁

戶終年捕魚外農民仍歸隴畝

乾隆志

四月八日浮屠浴佛

嘉靖府志

招寶山上寶陀寺供奉觀音二

月十九六月十九九月十九三期士女登山禮佛香煙最

盛

采訪冊

端午取菖蒲及艾插門戶或繫以綵勝佩於身女子作蘭

虎艾人簪首或削蒲根作葫蘆狀染雄黃繫於臂畫虎貼

牀上更糝雄黃菖蒲和酒飲之以辟邪穰毒爲角黍駱駝

蹄糕祀其先親戚各相餽遺

嘉靖志

六月竈民刮土最盛呼爲伏泥蓋三伏中日烈日燥較常

時多而更佳

乾隆志

七夕婦女用槿葉汁燂湯梳櫛庭陳瓜果乞巧

嘉靖府志

中元各家以牲醴羹飯祀其先謂之鬼節緇黃之流誦經

供佛設瑜伽餞口謂之蘭盆會

嘉靖府志

中秋士民家置酒翫月以月餅相饋

嘉靖府志

八月十五中秋

天下皆然惟四明則以十六爲中秋相傳史越王母夫人

以十六日生故易是日爲佳節俗因之不改

鄞志

或傳宋宗

藩所更亦未識孰是

陳志

重陽士人登高燕賞以茱萸泛酒飲之各家製重陽糕角

黍相饋遺

嘉靖志

冬至各家具香燭以祀神祇其大族宗祠亦有演戲用鼓

樂具牲醴以祀者

雍正府志

沿海之民於冬至後置窖藏冰以爲明歲漁期之用乾隆志

臘月二十四日各家拂塵至夜祀竈嘉靖志各家碾米粉作

年糕宋詩冊

除夕前數日各以牲羞果餌相餽謂之餽歲各家祀神及

先祖謂之送歲除夜聚家人飲食謂之分歲明燭爇香或

熾炭燔柴長幼坐以待旦謂之守歲家長賜錢與兒女謂

之押歲先期預備品物爲新歲罷市數日之用蒸米爲糗

新歲復饗而飯之換桃符寫春帖易門神謂之從新燒礮

竹燔蒼朮辟瘟丹謂之辟邪嘉靖志

一日三餐早曰天亮飯午曰晝過飯晚曰夜飯鄞志

舟人搖櫓皆向右浙東操舟者多向左鄞志



祭祀特重宗祠春秋二分冬夏二至在祠合享清明及十月朔則祭於墓祭畢共飲餽餘每遇忌日由考妣上溯高曾必設几筵祭於家豐儉則稱其有無云

浙江通志

婚禮男子及婚而冠者三加之禮習俗久略女子則當嫁時加笄焉

嘉靖府志

士大夫家締姻多重門第先憑媒妁通柬將幣如古問名禮至納采納徵俱崇儉約不以金幣相炫女家具匳亦不以絢綺珠玉相耀合卺後翌日拜姑嫜獻以女紅榛栗其風猶古

浙江通志

案近時婚禮大變風氣納吉問名自古有之今則憑媒議親未遞庚帖先論聘金甚至有所謂小禮

者尤屬無謂夫婚媾論財夷虜之道既作眷屬彼此皆宜守禮何得以錢幣爲市井貿易狀耶禮物陳設華麗相誇主持風化者宜痛革之

喪禮始卒及含殮多遵文公家禮或五日或七日服成受弔宗黨姻友各以香楮申奠俗尙浮屠每七必作佛事葬用石槨貧者用甌三日展祭新塋標插紙錢

浙江通志

乾隆志案曰今世俗埋葬祖父墳塋多惑於堪輿家之說營求吉壤經數年未歸窀穸者其在窮檐小戶葬不用槨以磚砌於四圍上覆之以石且無封土日久甌鼓石壓以致棺屍狼籍若遇水潦則漂沒無存積習相沿恬不爲怪司牧者宜禁革此

弊又今士庶之家凡遇婚喪必邀合族宴飲以爲豪舉乾餼以愆往往遂成嫌隙無力者每致鬻產以從事有司三令五申多方勸誠近乃少息

墮民謂之丐戶相傳爲宋罪俘之遺故擯之

丐自言則云宋將焦光墮

部落以叛宋投金故被斥

分置蘇松浙省雜處民間元人名爲怯憐戶

明太祖定戶籍扁其門曰丐卽有田禁充吏員糧里長乘車馬令其自相配偶男子則捕黿賣錫拘竹燈檠鍛爐鐵編機扣壘土牛土偶正旦元宵執響器以鬧人堂立春端午持土牛芒人以闖人室九月社夥會參神送聖迎燈走馬立冬打鬼胡花帽鬼臉鐘鼓劇戲種種沿門需索其婦人則爲人家拘髻剃婦面毛習媒灼伴良家新娶婦梳髮

爲鬚四民居業彼不得占四民所籍彼不得籍四民所常

服彼亦不得服所以辱且別之者也

墮民  
猥編

丐戶婦人髻稍高耳不飾環出恆持繖并包裹一事雖途

遇可別而識也

鄧志

胡湜蛟川竹枝詞 三面波光擁一城江潮時共海潮  
生人家住在潮聲裏半是風聲半雨聲 羅羅海物勝  
園蔬蠶醬螺羹入饌初最喜年年三四月沿街聽賣小  
黃魚 蛟門兩扇豁長天遙引穿山一抹煙每到秋來  
風色好 蛟門兩扇豁長天遙引穿山一抹煙每到秋來  
半捕魚遊弟兄昨夜開船去明日剛剛大水上浮魚期大  
時節正黃梅煙雨江城瘴不開忽聽半街人語雜閩船  
多少進關來 梓山高蔭石蓮香下接鯤池舊講堂記  
得春秋好時節白雞黃酒祀文昌 高河塘外秋風吹  
長山橋頭秋月白 一路看山到霞浦 怡逢九月望潮時  
望南洋風雨北洋煙 達蓬山上海雲晴達蓬山下江  
月明阿儂生小山前住不見樓臺壘氣成 兒童少小  
不知愁城北城南恣浪遊偶向太平橋下過無端唱出

太平

張振夔蛟川竹枝詞 孟冬十月 鼇柱峯雞鳴望見扶  
桑東金蛇百萬戲水底雙輪飛上馮夷宮 逆風振舵  
一餞帆行斜擘扁舟一葉輕若到拘蠻江拘轉儂心還有  
頭見怪浪郎出蛟門還未還 南船北船放碗多江干  
落日竹枝歌阿儂生長風波裏不怕浪花濺越羅  
家門對大江開自送郎行信未回聞道他鄉好行樂他  
鄉日有船來 七寶寺前南宋鐘老僧猶是曉來春  
遙遙人百餘年後依舊人開眸正濃 換罷青龍笑口  
開鄰家爆竹緊相催阿婆理髮恩恩出更向僧堂坐夜  
來 準備元宵三日餐了頭羹熟坐團團兒嬌女寵爭  
滋味乍道甜來又道酸 檢點竹符木筋俱女兒三五  
悄相呼阿翁歲暮愁荒旱 蠲待更深問紫姑 莫問墨  
魚旺若何儂先踏月聽笙歌得教元夕明於晝足抵他  
人一飽多歸驂玩晴 過了靈峯又竹山爭求戒牒  
脫金環年年度得人千百 纔供頭陀一歲開江邨同  
護五都神全副鑾儀出色新報道前驅騎馬至燭龍十  
里接城闌 育王山中二月時傳看舍利眼迷離分明  
一點心頭鏡黑白青紅各自知 黃梅天氣雨兼晴江  
上蜃樓照眼明欲報郎從高處望遙空一抹綵雲橫

團扇羅裙八月時阿婆齊結再生緣城中城外芒芒過  
入寺何人走得全秋房同畔一笑煩先問今日誰家作  
未央更調琴瑟人蘭房雙雙對對枕衾全堆遍銀牀不  
賀郎鞭數鴛鴦三十六何如併作並頭蓮嫩銀牀不  
放眠細數鴛鴦三十六何如併作並頭蓮嫩銀牀不  
爲采石華難阻郎采歸妾自矚朝陽昨聞白浪高於  
屋默視團團樂長似箇水底裏身勝下醫西風獵獵兩  
肩冰家中僅有玉祥丹似此求魚能不能也勻脂粉  
貼流黃家住城西門外莊慣送鳳凰一處宿阿儂自有  
野鴛鴦驕傲遊蹤候濤山外紅毛船黑鬼張帆  
白鬼眠寄語舵工好同航欄江埠頭近在前欲向金  
溪問是非鑑池西望夕陽微南山少日傳經處賸有么  
童放學歸

禁女擡閣說

吾邑每年三四月間有東嶽會都神會以報闔邑平安爲名皆各市肆商賈及文武衙門營兵胥役糾贊出會鼓樂旗蓋在所不禁惟以娼家婦女豔服扮擡閣高立歌唱則最爲惡習蓋塵市之流類多輕薄見妓女則目眩心醉於是聚飲戲謔賭博抽頭種種耗財以至失業其少年子弟尤易於蠱惑因臺上之目挑成桑間之私約一生淫蕩之根實萌於此且遠近游民聞有女擡閣結隊而至路途擁擠行人多致傷跌而富豪者更有載他處之妓泊舟於街頭聯舟喧譁舉國若狂生事在所不免余嘗謂女擡閣之弊與無恥男子演串客戲皆爲敗壞風俗地方官必當出

示嚴禁違者治罪愼毋從俗而置之不聞宜思此亦正人

心之大防也

芝紉老人筆記